



17. august 2012
08. marts 2012

UKA 2012/56
UPA 2012/56

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Sulisumik avataaneersumik atorfinitsitsinissamut imaluunniit sulisitsinissamut atatillugu ullut 14-it qaangiutinnginneranni itigartitsissummik akuersissummilluunniit akissuteqarnissamut piffissarititap qaammatinngortillugu sivitsorneqarnissaa anguniarlugu, Kalaallit Nunaannut suliffissarsiortut killilersimaarnissaat pillugu Inatsisartut inatsisaata nr. 27 30. oktober 1992-imeersup allangortinneqarnissaa siunertaralugu Inatsisartut aalajangiiffigisassaattut siunnersuut.
(Inuit Ataqatigiit Inatsisartuni ilaasortaataat)

Tunngavilersuut:

Kalaallit Nunaannut suliffissarsiortut killilersimaarnissaat pillugu Inatsisartut inatsisaat nr. 27 30. oktober 1992-imeersoq naapertorlugu atorfinnut inatsimmi § 2-mi pineqartunut, avataaniit sulisussarsiorneq Nunatsinni sulisussanik aatsaat pissarsisoqarsinnaangikkaangat pisinnaavoq. Suleriuseq ullumikkut malinneqartussa q naapertorlugu suliffissarsiuussisarfiit pisussaaffigivaat illoqarfimmi imaluunniit Kalaallit Nunaanni suliffissarsiuussisarfinnit allanit sulisussamik Kalaallit Nunaanneersumik atorfinnut piukkunnaateqartumik innersuussisoqarsinnaanersoq misissoqqaassallugu. Atorfik aatsaat Kalaallit Nunaanneersumik inuttalerneqarsinnaangippat sulisitsisoq kommunalbestyrelsemut sulisussamik avataaneersumik atorfinitsitsinissaminut akuersissummik qinnuteqaateqarsinnaavoq. Inatsimmi § 6, imm. 3-mi aalajangersarneqarsimasoq naapertorlugu sulisitsisumut akuersissut tunniunneqartutut isigineqalersarpoq qinnuteqartup qinnuteqaatimi tunniunneraniit ullut 14-it qaangiutsinnagit allamik nalunaarutisisimangippat.

Illoqarfimmi suliffissaaleqineq qaffakkiartortoq Naatsorsorsueqqissaartarfiup kisitsisaataasa kingulliit takuteqqammerpaat. 2011-mi decemberimi illoqarfimmi sulisinnaasunut sanilliullugit suliffissaaleqinermik eqqugaasimasut %-inngorlugit 10,3 %-inut amerleriaateqarsimapput, pifissamilu aggersumi ilorraap tungaanut saariartoqarnissaa ilimanaateqarani. Taamaakkaluartorli illoqarfimmi annerni takulertornartoq tassavoq sulisussanik avataaneersunik tikisitsiuarneq – pingaartumik sanaartornerup, eqqiaasitsisarnerup, akunnittarfeqarnerup neriniartarfeqarnerullu iluani, uffa atorfiit tamakku nunaqavissunik kivinneqarsinnaassasut takorloornaraluortoq.

Soorunami pissutsit taamaalernerat attattuarneqarsinnaangilaq oqaatigisariaqarporlu tamanna Inatsisartut inatsisiliuuseqqaarnerannut naapertuukkunnaarsimasoq.

Siunertarineqanngisaannarsimavoq suliffissaaleqisoqartillugu aammalu sulisartunik Kalaallit Nunaanneersunik atorfinnut innersuussisoqarsinnaatillugu sulisussanik avataaneersunik atorfinitsitsisarnissaaq.

Inuit Ataqatigiinni tunngaviusumik isumaqarpugut atorfiit inuttaqanngitsut sapinngisamik nunaqavissunik inuttalerneqartassasut, taamaaliornikkut akileraarutitigut isertitassat aammalu ilisimasat Nunatsinniiginnarsinnaaniassammata. Inuit Ataqatigiit aammattaq

anguniagaraarput innuttaasut tamakkiisumik ilaannakortumilluunniit imminnut pilersorsinnaalerlutillu inuiaqatigiit aningaasarsiornikkut ineriartornerannut ikorfartueqataalersinne-qassasut inuttut namminneq aamma ineriartuutigisaminnik.

Avataaniit suliartortut pillugit inatsit nutarteriffigissallugu taamaammat piffissanngorsorinarpoq. Inatsisip atortinneqarneranut atasumik suleriaatsit allannngortittariaqarput. Taamatuttaaq sumiifikkaartumik sulisoqarnikkut soqutigisaqatigiiffiit, soorlu GA-p aammalu SIK-p immikkoortortaarfii qanimut peqataatinneqalernissaat aqutissiuunneqartariaqarpoq aammalu inatsit siunertamisut atortinneqarnersoq pillugu nakkutiginninneq sukatertariaqarluni.

Aalajangiiffigisassatut siunnersuut matumani pineqartoq inatsimmi § 6, imm. 3-mi piffissarititaasoq pillugu aalajangersakkamut taamaallaat tunngatinneqarpoq, siunnersuutimmi matuma saniatigut aamma Inuit Ataqtigiit aalajangiiffigisassatut siunnersuutigivaat kommuneni tamani suliffissaqartitsinermik ataatsimiititalianik pilersitsisoqassasoq, sulisumik avataaneersumik atorfinitsitsisoqartinnagu tamatigut tusarniaavigineqartartus-sanik.

Taamaattumik siunnersuutigineqarpoq sulisumik avataaneersumik atorfinitsitsinissamut imaluunniit sulisitsinissamut atatillugu ullut 14-it qaangiutinnginneranni itigartitsissummik akuersissummilluunniit akissuteqarnissamut piffissarititaasoq qaammammik ataatsimik sivilissuseqalissasoq.

Sivitsuinerup kommunemi suliffissarsiuussisarfiit piffissaqarnerulersissavai, taamaalillutillu sulisinnaasut akornanni kikkut inatsimmi § 2-mi § 3-milu piumasarineqartut naapertorlugit kalaaliusutut naatsorsuunneqarsinnaanersut pillugit suliaqarneq periarfissagissaarnerulisalluni. Tamanna aqutissiuunneqarsinnaappat avataaniit suliartortartut killilersimaarneqarnerat pitsaanerulersinneqassaaq taamaaliornikkullu suliffissaaleqineq aamma apparsarneqarsinnaanngussalluni.

Aningaasarsiornikkut allaffissornikkullu pisortanut kingunissai.

Inatsisitigut aqqiissuteqarnissaq suliassaqaarfimmut aningaasaliussaareersut iluannit matussuseqarsinnaassasoq naatsorsuutigisariaqarpoq. Siunnersuutip matuma saniatigut GA-p aammalu SIK-p immikkortortaarfiiisa peqataaffigisaannik sulisunik avataaneersunik atorfinitsitsisoqartinnagu, kommuneni suliffissaqartitsinermik ataatsimiititalianik tusarniaavigineqartussanik pilersitsisoqassasoq aamma siunnersuutaammat, tamanna kommunit aningaasartuuteqarnerulernerannik nassataqaratarsinnaassaaq.

Taamaattorli aningaasaleqqittariaqarneq Akileraartarnermut Atugarissaarnermullu Isumalioqatigiissitap inerniliussaanut matumunnga nallersuunneqartariaqarpoq; inuup ukiumi ataatsimi pisortanit ikiorsiissutisiani sulilernermigut taarserunigit pisortat aningaasaataat 220.000 kr.-init ikinnerunngitsunik pitsanngoriassagalarput.

Aningaasarsiornikkut allaffissornikkullu namminersorlutik inuutissarsiortunut kingunissai.

Siunnersuut aningaasarsiornikkut allaffissornikkullu namminersorlutik inuutissarsiortunut ajorseriaataasussamik kinguneqassangatinneqanngilaq. Paarlattuanik naatsorsuutigisariaqarpoq siunnersuut sulisitsisunut ileqqaarutaassasoq avataaniit suliartortitanut sulisitsisup aningaasartuutigisartagai sipaarneqarsinnaanngussammata.

Aningaasarsiornikkut allaffissornikkullu innuttaasunut kingunissai.

Siunnersuut piviusunngortinneqarpat suliffissaaleqisut amerlanerusut imminnut pilersorsinnaalerlutillu inuiaqatigiit aningaasarsiornikkut ineriartornerannut ikorfartueqataalersinne-

qassapput inuttut namminneq aamma ineriartuutigisaminnik.